

政和御製冠禮

漢書卷之四

欽定四庫全書

政和御製冠禮目錄

卷一

冠議

叙原

議年

議時

議衣冠

議加數

卷二

議就廟

議賓主

議醴饌

議醺

議嫡庶

議見拜

議樂

議上禮

議服制

卷三

冠儀

天子
周 後漢 魏

卷四

天子
晉 後魏 北齊 唐

卷五

太子

周 漢

北齊 後周 魏

隋 晉

唐 宋

本朝 梁

卷六

太子

唐

卷七

太子

唐 本朝

庶子

周 魏 唐

卷八

親王

漢齊

魏唐

晉

本朝宋

卷九

品官

漢唐

晉

卷十

品官

唐本朝

女笄

周唐

欽定四庫全書

政和御製冠禮卷一

冠議

叙原

禮記云凡人之所以為人者禮義也禮義之始在於正容體齊顏色順辭令容體正顏色齊辭令順而後禮義備以正君臣親父子和長幼君臣正父子親長幼和而後禮義立故冠而後服備服備而後容體正顏色齊辭

令順故曰冠者禮之始也是故古者聖王重冠古冠禮
筮日筮賓所以敬冠事敬冠事所以重禮所以為國本
也故冠於阼以著代也醮於客位三加彌尊加有成也
已冠而字之成人之道也見於母母拜之見於兄弟兄
弟拜之成人而與為禮也玄冠玄端奠摯於君遂以摯
見於卿大夫鄉先生以成人見也成人之者將責成人
禮焉也責成人禮焉者將責為人子為人弟為人臣為
人少者之禮行焉將責四者之行於人其禮可不重與故

孝弟忠順之行立而後可以為人可以為人而後可以
治人也故聖王重禮故曰冠者禮之始也嘉事之重者
也是故古者重冠故行之於廟行之於廟者所以尊重
事尊重事而不敢擅重事不敢擅重事所以自卑而尊
先祖也家語云邾隱公既即位將冠使大夫因孟懿子
問禮於孔子孔子曰其禮如世子之冠冠於阼者以著
代也醺於客位加其有成三加彌尊導喻其志冠而字
之敬其名也雖天子之元子猶士也其禮無變天下無

生而貴者故也行冠事必於祖廟以裸享之禮將之以金石之樂節之所以自卑而尊先祖示不敢擅也懿子曰天子未冠即位長亦冠乎孔子曰古者王世子雖幼其即位則尊為人君人君治成人之事者何冠之有懿子曰然則諸侯之冠異天子與孔子曰君薨而世子主喪是亦冠也已人君無所殊也懿子曰今邾君之冠非禮也孔子曰諸侯之有冠禮也夏之末造也有自來矣今無譏焉懿子曰諸侯之冠其所以為賓主何也孔子

曰公冠則以卿為賓無介公自為主迎賓揖升自阼主
於席北其醴也則如士饗之以三獻之禮既醴降自阼
諸侯非公而自為主者其所以異皆降自西階玄端與
皮弁異朝服素鞞公冠四加玄冕祭其酬幣於賓則束
帛乘馬王太子庶子之冠擬焉皆天子自為主其禮與
士無變饗食賓也皆同懿子曰始冠必加緇布之冠何
也孔子曰示不忘古夫古冠布齋則緇之其緹也吾未
之聞今則冠而敝之可也

石渠禮儀云冠者人道之始也嘉事之善也是以聖王重之必行於廟主人不敢自專請賓共成也亦謂人之父恥自成其子故請賓也五經要義云冠嘉禮也冠者首服既加而後人道備故君子重之以為禮之始矣國語云趙文子冠見韓獻子獻子曰戒之此謂成人成人在始與善始與善善進善不善蔑由至矣始與不善不善進不善善亦蔑由至矣如草木之產也各以其物人之有冠猶宮室之有牆屋也冀除而已又何加焉通

典云周禮雖有服冕之數而無天子冠文又儀禮有公
侯冠禮者王肅鄭氏皆以為夏末哀亂篡弑所由生焉
故作公侯冠禮則明天子無冠禮之審又無大夫冠禮
古者五十而後爵何大夫冠禮之有周人五十而有賢
才則試以大夫之事猶行士禮故筮賓於阼以著代醮
於客位三加彌尊皆士禮耳

議年

五禮精義云春秋傳曰人君十二而冠書傳曰成王十

四而冠弁啟金縢許慎曰歲星為紀年十二歲而周於天天道大備人君年十二可以冠矣

五禮名議云天子諸侯十二而冠法歲星十二年一周天所謂一終也大戴禮云文王十二而冠十三而生伯邑考又左傳襄九年晉侯曰國君十五而生子冠而生子禮也其天子之子加冠亦早所以得祭殤有五諸侯之子則二十而冠以檀弓云公之適長殤故知之大夫冠年無文案喪服大夫為兄弟之長殤既為長殤則二

十而冠曲禮曰人生二十曰弱冠是也石渠禮儀云男子陽也陽成於陰偶數起於二終於二十陰數之偶也故二十而冠謂小成也

開元禮義鑑云禮曰冠而不為殤男子有德行納為大夫則不待二十而冠其合禮矣

議時

夏小正記云二月冠子之時也

晉志云禮醮辭曰令月吉日以歲之正以月之令漢代

以來天子諸侯以正月甲子若丙為吉曰可加元服儀
從冠禮也

五禮精義云冠皆取正元之吉

司馬彪漢儀志曰正月甲子若丙子為吉可加元服

晉王彪之曰冠自卜日不必正元禮云夏冠用葛屨冬
冠用皮屨明不定日月也漢惠帝以三月順帝以正月
丙子但於冠月擇甲子丙子而已

晉志云按魯襄公冠以冬漢惠帝冠以三月明無定月